

**Ն. Ս. Օ. Տ. Տ. ՎԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ՕՐՀՆՈՒԹՅԱՆ
ԽՈՍՔԸ ՀՅ ԶՈՒ ՀՈԳԵՎՈՐ ԱՌԱՋՆՈՐԴՈՒԹՅԱՆ 20-ԱՄՅԱ ՀՈՐԵԼՅԱՆԻ ԱՌԻԹՈՎ**

(8 դեկտեմբերի 2017 թ.)

«Առէ՛ք զապառազինութիւնն Աստուծոյ, զի
կարո՞ղ լինի՞ջիք ի դիմի հարկանել չարին յաւուրն
չարութեան» (Եփ. Զ. 13):

Հայաստանի Հանրապետության պաշտպանության մեծարգո նախա-
րար,

Գերաշնորհ, հոգեշնոր, արժանապատիվ հայրեր,

Պատվարժան զինվորականներ,

Սիրելի հավատավոր զավակներ.

Հայրապետական սիրով ողջունում ենք Հայոց բանակում Հոգեւոր
առաջնորդության կազմավորման 20-ամյակի հոբելյանին նվիրված այս
հանդիսության մասնակիցներին՝ եւ բերում ձեզ Մայր Աթոռ Սուրբ Էջ-
միածնի օրհնությունը, ինչպես եւ՝ զգոնության ու քաջության պատգամը
առաքելական. «Առե՛ք Աստծո սպառազինությունը, որպեսզի կարողա-
նաք հար օրում դեմ կանգնել չարին»:

Փառք եւ գոհություն ենք մատուցում Աստծուն, որ անսասան ու
հաղթական է Հայոց բանակը, որն այսօր հուսալի գրավականն է մեր ժո-
ղովրդի ապահով, խաղաղ ու ստեղծագործ կյանքի:

Մեր բանակը ձեւավորվեց անկախ պետականության հաստատման եւ
Արցախի ազատագրության հերոսական օրերում ու կայացավ եւ զորա-
ցավ մեր պետականության ամրապնդման հետ: Մեր ժողովուրդը ամեն
դժվարություն հանձն առավ հայրենի հողը պաշտպանելու եւ իր ազատ
կյանքը կառուցելու համար: Հայրենիքի պաշտպանության նվիրական
պայքարում, նաեւ մարտի դաշտում, Առաքելական մեր Սուրբ Եկեղեցին
իր զավակների կողքին էր՝ զորացնելով նրանց Աստծո խոսքով ու հա-
վատքով, որն իբրեւ հոգեւոր սուսեր՝ բարձրանում է ընդդեմ բռնության,
կեղծիքի, իրավունքի ոտնահարման եւ ամեն չարիքի:

Հայոց բանակում հովվական ծառայության սկիզբը դրվեց հայրենի
պետության անկախության առաջին տարիներին երջանկահիշատակ Մեր
նախորդ Գարեգին Ա. Ամենայն Հայոց Կաթողիկոսի կողմից: Լուսավոր-
չի գահին բազմելով՝ Մենք կարեւոր նկատեցինք բանակում հոգեւոր

ծառայություն կարգավիճակի ամրապնդումը, որն իրականացավ հատուկ հուշագրի ստորագրությամբ՝ Պաշտպանության նախարար եւ ներկայիս ՀՀ նախագահ տիրար Սերժ Սարգսյանի հետ: Այնուհետ հովվական ծառայությունները բանակում բարձրացրինք Հոգեւոր առաջնորդության աստիճանի: Այսօր գոհունակությամբ ենք անդրադառնում նաեւ, որ Հայոց մեծ արքա Աշոտ Երկաթի խաչը, որը կրում է մեր Տեր Հիսուս Քրիստոսի խաչափայտի մասունքը, հաստատեցինք որպես պահպան խաչ սիրեցյալ մեր բանակին եւ ընծայեցինք բանակային զորատեսակներին օրհնված խաչվառ դրոշներ:

Ազգային-եկեղեցական մեր կյանքում, տերունապատվեր առաքելություն ստանձնելու հետ մեկտեղ, եկեղեցականները, Գեւորգյան հոգեւոր ճեմարանի չրջանավարտ սարկավազները անպայմանորեն իրենց ծառայությունն են իրականացնում բանակում՝ հոգեւոր մխիթարություն, քաջալերություն փոխանցելով մեր զինվորներին, զորացնելով նրանց հավատքը, բարձր պահելով մարտական ոգին եւ նրանց աջակիցն ու զորակիցը լինելով հայրենիքի պաշտպանության նվիրական գործում: Ուրախություն է հայրապետիս համար արձանագրել, որ մինչ այսօր Հայոց բանակում ծառայել են ավելի քան երեք հարյուր հոգեւոր սպասավորներ: Արդարեւ, մեր անկախ պետականության քառորդդարյա ընթացքում հոգեւոր սպասավորությունը բանակում ամենակարեւոր ու արգասաբեր անդաստաններից մեկը եղավ, որտեղ ազգային իշխանությանը եւ Հայ Եկեղեցու համագործակցությունն առատ հունձք ապահովեց՝ մեկի դիմաց երեսուն, վաթսուն եւ հարյուր (հմտ. Մարկ. Դ. 8):

Սիրելի՛ գնդերեցներ, եկեղեցականների ծառայական կյանքը զինվորություն է, Պողոս առաքյալի խոսքով՝ զինվորություն՝ «Աստծո սպառազինությամբ..., մեր մեջքը գոտեպնդած ճշմարտության Ավետարանով, հագած արդարության զրահը, մեր ոտքերը ամրացրած խաղաղության Ավետարանի պատրաստությամբ, ...հավատի վահանով, փրկության սաղավարտով ու Հոգու սուսերով, որ Աստծո Խոսքն է, որպեսզի կարողանանք չար օրում դեմ կանգնել չարին...» (հմտ. Եփ. 2. 13-17): Հայ եկեղեցականը չի սպասում հրավերի՝ չարի դեմ պայքարելու, չի տատանվում հայրենիքի ու հավատի համար իր կյանքը գոհելու, չի նահանջում, երբ չարն իր նենգ մտադրությամբ անցնում է հայրենյաց սահմանը՝ ավերելու մեր տունը, ոչնչացնելու հայրենական մեր նվիրական սրբությունները: Խաչով ու սրով Հայ եկեղեցականը միշտ եղել է հայրենյաց պաշտպանության դիրքերում: Սա է մեր Եկեղեցու սրբազան ու դարավոր առաքելության մեծագույն պատգամը՝ ապրել եւ ծառայել մեր ժողովրդի հոգեւոր ու ֆիզիկական փրկության համար՝ Ավարայրից մինչեւ Արցախ ու մինչեւ վախճանը ժամանակների: Այդ գիտակցությամբ նաեւ Սարգսյան-

պատի ճակատամարտում, 1918 թ. մայիսյան հերոսամարտերում, որոնց 100-ամյակը պիտի տոնենք հաջորդ տարի, Գեւորգ Ե. Ամենայն Հայոց երանաչնորհ Կաթողիկոսն իր խրոխտ կեցվածքով ու ոգեչնչումով զորացրեց մեր ողջ ժողովրդին, եւ հայ եկեղեցականները, հայոց Հայրապետի օրինակով, մեր զորաց հետ աննահանջ պայքարեցին մեր հայրենիքի, հավատքի, մեր ժողովրդի ազատ կյանքի եւ իրավունքների պաշտպանության համար: Այսօր դուք, սիրելի՛ գնդերեցներ ու հոգեւոր սպասավորներ, յուրաքանչյուր հայ եկեղեցականի հետ կոչված եք հոգի եւ սիրտ ներդնելով կենսագործելու մեր սուրբ նախնիներից ավանդված առաքելությունը՝ հոգեւոր սպառազինության պաշտպանությունը կերտելու մեր բանակում եւ մեր ժողովրդի կյանքում:

Հորեկյանական այս առիթով Հայրապետական Մեր գնահատանքն ենք հայտնում Հայաստանի զինված ուժերի գերագույն գլխավոր հրամանատար, ՀՀ նախագահ տիար Սերժ Սարգսյանին, պետական ավագանուն եւ բանակի ողջ հրամանատարական կազմին՝ Հայ Եկեղեցու առաքելությունը Զինված ուժերում նվիրական գիտակցումով ու համագործակցության բարձր ոգով արժեւորելու համար: Մեր գնահատանքը՝ ՀՀ պաշտպանությունն նախարար մեծարգո տիար Վիգեն Սարգսյանին, բանակում հոգեւորականների ծառայության հանդեպ առանձնակի ուշադրության, հոգեւոր առաջնորդության գործունեությունն ըստ ամենայնի աջակցելու, հատկապես՝ մեր բանակի մարտունակությունն ու ոգին բարձր պահելու նախանձախնդրության համար: Այդ նախանձախնդրության վկայությունն է նաեւ հորեկյանական այս հանդիսությանը եւ նման միջոցառումներին մեծարգո նախարարի մասնակցությունը: Հայրապետական Մեր գնահատանքն ու օրհնությունն ենք բերում ՀՀ զինված ուժերի հոգեւոր առաջնորդին՝ Գերաչնորհ Տ. Վրթանես եպիսկոպոս Աբրահամյանին, հոգեւոր առաջնորդության գնդերեցներին՝ մաղթելով նրանց նվիրական առաքելության մեջ նորանոր հաջողություններ: Նոր ձեռքբերումներ ենք մաղթում մեր քաջարի բանակին, պանծալի ծառայություն՝ բոլոր սպաներին ու մարտիկներին: Աղոթում ենք, որ Աստված Իր Աջի ներքո պահպանի ձեզ եւ օրհնի ձեր ու ձեր ընտանիքների կյանքը:

Թող խաղաղությունն ամուր ու հաստատուն լինի հայրենի մեր սահմաններում: Թող երկնավոր Տերը պահպանի մեր ժողովրդին եւ զորացնի ու բարօր դարձնի հայրենի մեր երկիրը: Թող արգասաբեր ու պտղաբեր լինի մեր Եկեղեցու առաքելությունը՝ ի փառս Աստծո եւ ի պայծառությունն ազգիս:

Շնորհք, սէր եւ խաղաղություն Տառն մերոյ Յիսուսի Զրիստոսի եղիցին ընդ ձեզ եւ ընդ ամենսեանս. ամէն: